


# Upernaap niviugaa

**Qallunaatut atia:** Arktisk vårflue  
**Latiinerisut atia:** Apatania zonella  
**Tuluttut atia:** Caddisfly  
**Sorlernut ilaava:** Sullinernut  
**Uumasooqatai:** Upernaap niviugai  
**Ilaqutai:** Apatania



Upernaap niviugai Kalaallit Nunaanni tamarmi tatsini kuunnilu nalinginnaapput. Nunatsinnia rnaviaannaapput. Kinguaassisinneqanngikkaluarlutik manniliortarput.

## Ilisarnaatai

Upernaap niviugai tunuleriinnik marlunnik meqqulinnik suloqarput, amitsuaqqanik takisuunik maluginiuteqarlutik. Mikisuaraapput sului salliit qillertuunngitsut qasertut qaamasuullutik taartunik qassutaasanik allallit.

## Nerisai

Inersimasut qaqutigunnaq nerisarput, ilaalli naasut tungusunnitsuunik milluaasarlutik. Quperlui kiisortuugajuttut uumasuaraaqqanik assigiinngitsunik nerisarput. Quperluisali ilaasa erngup naasui algellu nerisarpaat.

### Paasisutissat

Uumaffii: Sumi tamani  
Takissusia: 8 mm  
Sului siaarlutik: 18 mm  
Quperluusarnera: Ukiut 3-4

### Nalunngiliuk?

Kalaallit Nunaanni upernaap niviugaasa assigiinngitsut tamarmik quperlui assigiinngitsut atorlugit "iniliortarput", soorlu ujaraaqqat, qalerussat, sioqqat naasullu ilaat, sullulimmut siilikiusamut qajannaarlugit. Quperluata niaqua niuilu kisimik nuisasarput. Eqquani qituttumi quperluata puuatigut masiisat aqquasarlugit imeq kuuttarpoq.